

艺
文
类
聚

艺

文

类

聚

藝文類聚卷第三十一

唐太子率更令弘文館學士歐陽詢撰

明

秣

陵

王元貞校

人部十五

贈答

贈荅

毛詩曰無言不訓又周公乃爲詩以貽王名之曰鴉
鵲焉

尹吉甫作頌其詩孔碩其風肆好以贈申伯

晏子曰曾子將行晏子送之曰君子贈人以軒不如
贈人以言

史記曰孔子適周見老子辭去老子送之曰吾聞富貴者送人以財仁者送人以言吾竊仁者之號請送子以言

孫卿子曰贈人以言重於金石珠玉勸人以言美於黼黻文章聽人以言樂於鐘鼓琴瑟

莊子曰凡交近則必相靡以信遠則必忠之以言

韓子曰鄭人有遺燕相書者夜書火不明因謂持燭者曰舉燭而過書舉燭非書意也燕相國受書而悅之曰舉燭者高明也舉賢任之司以治

穆天子傳曰穆王饗西王母于瑤池之上上賦詩往

來辭義可觀

漢書曰古者諸侯卿大夫交接鄰國以微言相感常揖讓之時必稱詩以喻其志又曰陳遵爲河南太守既至官常遣從使西召善書吏十人於前治私書謝京師親故遵憑几占書數百封親疎各有意

文士傳曰桓麟伯父烏官至太尉麟年十二在座焉告客曰吾此弟子知有異才殊能作詩賦各乃爲詩曰甘羅十二揚烏九齡昔有二子今則桓生麟即應聲荅曰邈矣甘羅超等絕倫伊彼楊烏命世稱賢嗟予羸弱殊才偉年仰慙二子俯媿過言

漢雜事曰高彪謁馬融辭疾不見彪覆刺與書曰聞
高風爲日久矣故不待介者造君子之門冀一見龍
光敘腹心之願不圖辭之以疾昔者周公兄父文武
九命作伯以君華夏猶握沐吐食以接白屋之士天
下歸德歷載邈矣今君不能相見宜哉融省書大慙
遣人辭謝追請徑去不還

先賢行狀曰杜安入太學時號曰神童時貴戚慕安
高行多有與書者不輒發以慮後患常鑿壁藏書當
時皆嘉其慮遠

會稽典錄曰陳業少特操沛國桓儼當世英俊避地

會稽聞業高節欲與相見終不獲後儼浮海南入交
州臨去遺書與業曰不因行李以係陰山白樓日從
容養高動靜履直季世多艱爰適樂土聞高風飢渴
語言知乃深隱邈然終時求仁斯得勤而無憾齊蹤
古賢何其優哉

蜀志曰馬良使吳良謂諸葛亮曰今銜國命協睦二
家幸爲良介於孫將軍亮曰君試自爲文良即爲草
曰寡君遣掾馬良通聘繼好以紹昆吾豕韋之勲其
人吉士荆楚之令鮮於造次之華而有克終之美願
降心有納以慰將命權大悅之

文章敘錄曰杜摯與母丘儉鄉里相親故爲詩與儉求仙人藥一丸欲以感切儉求助也

荀氏家傳曰荀勗蜀平之後遣使通吳司馬文王用公所作書與孫皓皓報命和親王謂公曰君前作書使吳思順勝十萬之衆也

楚辭曰結微情以陳詞兮矯以遺夫美人

詩後漢蔡邕荅對元式詩曰伊余有行爰戾茲邦先進博學同類率從濟濟羣彥如雲如龍君子博文貽我德音辭之集美穆如清風又荅卜元嗣詩曰斌斌碩人貽我以文辱此休辭非余所希敢不酬荅賦誦

以歸

魏王粲贈蔡子篤詩曰悠悠世路亂離多阻濟岱江
衡邈焉異處風流雲散一别如雨

魏徐幹答劉楨詩曰與子別無幾所經未一句我思
一何篤其愁如三春雖路在咫尺難涉如九關陶陶
朱夏别草木昌且繁

魏應瑒報趙淑麗詩曰朝雲不散久結成陰離群猶
宿永思長吟有鳥孤栖哀鳴北林嗟我懷矣感物傷情

魏繁欽贈梅公明詩曰瞻我北園有條者桑邁此春
景既茂且長氤氲吐葉柔潤有光黃條蔓衍青鳥來

翔日月其邁時不可忘公子瞻旃勲名乃彰

魏程曉贈傅休奕詩曰煢煢獨夫寂寂靜處酒不盈觴肴不掩俎厥客伊何許由巢父厥醴伊何玄酒瓠脯又贈傅休奕詩曰三光飛景玉衡代邁龍集甲子四時成歲權與授代徐陳蕩穢元服初嘉萬福咸會赫赫應門嚴嚴朱闕羣后揚揚庭燎晢晢

魏邯鄲淳荅贈詩曰我受上命來隨臨菑與君子處曾未盈朞見召本朝駕言趣期羣子重離首命于時餞我路隅贈我嘉辭既受德音敢不荅之余惟薄德既局且鄙見養賢族於今四祀既庇西伯永誓沒齒

今也被命我在不俟瞻戀我侯又慕君子行道遲遲
體逝情止豈無好爵懼不我與聖主受命千載一遇
攀龍拊鳳必在初舉行矣去矣別易會難自強不息
人誰獲安願子大夫勉匱成山天休方至萬福爾臻
晉張華荅何劭詩曰良朋貽新詩示我以遊娛穆如
灑清風煥若春華敷自昔同寮案於今比園墟衰疾
近辱殆庶幾並懸輿散髮重陰下把杖臨清渠屬耳
聽鳴禽流目玩儵魚從容養餘日取樂於桑榆又詩
曰駕言歸外庭放志永棲遲相伴步園疇春草鬱鬱
滋榮觀雖盈目親友莫與偕悟物增隆思結戀慕同

事類彙編 山部卷之三十一 五
儕援翰屬新詩永歎有餘懷又贈摯仲治詩曰君子
有逸志棲遲於一丘仰蔭高林茂俯臨淥水流恬淡
養玄虛沉精研聖猷

晉何劭贈張華詩曰四時更代謝萬物迭卷舒暮春
忽復來和風與節俱俯臨清泉涌仰觀嘉木敷在昔
同班司今者並園墟私願偕黃髮逍遙樂琴書舉爵
茂陰下攜手共躊躇奚用遺形骸忘筌在得魚

晉潘岳爲賈謐贈陸機詩曰神農更生軒轅承紀畫
野離疆爰封衆子夏殷旣襲宗周繫祀綿綿瓜瓞六
國互峙疆秦兼并吞滅四隅子嬰面櫬漢祖應符靈

獻微弱在涅則淪三雄鼎足孫啓南吳南吳伊何僭
號稱王大晉統天仁風遐揚僞孫銜璧奉土歸疆婉
婉長離陵江而翔長離云誰咨余陸生鶴鳴九臯猶
載厥聲況乃海隅播名上京爰應旌招撫冀宏庭蕃
岳作鎮輔我京室旋及桑梓帝弟作弼式云國官清
塗攸失吾子洗然恬淡自逸廊廟惟清俊又是延擢
應嘉舉自國而遷齊轡羣龍光贊納言優游省闥珥
筆華軒昔余與子繾綣同朝修日朗月攜手逍遙自
我離羣二周于今雖簡其面分著情深子其超矣實
慰我心發言爲詩望侯好音欲崇其高必重其曾在

南稱甘度北則橙崇子鋒穎不騫不崩

晉陸機答賈謐詩曰先天創物景命是膺降及羣后
迭毀迭興邈矣終古崇替有徵在漢之季皇綱幅裂
雄臣騰驚義夫赴節釋位揮戈言謀王室王室之亂
靡邦不泯如彼墜景曾不可振乃眷三哲俾乂斯民
啓土綏難改物承天天厭霸德皇祚告釁獄訟違魏
謳歌逼晉陳留歸蕃我皇登禪庸嶠稽顙三江改獻
惟公太宰光翼二祖誕育洪胄纂戎于魯昔我逮茲
時惟下僚及子棲遲同林異條年殊志密服舛義稠
遊跨三春情固二秋祇承皇命出納無違往踐蕃朝

來步紫微升降秘閣我服載暉孰云匪懼仰肅明威
分索則易攜手實難念昔良遊茲焉永歎公之言感
貽此音翰蔚彼高藻如玉如蘭民之胥好徇狂厲聖
儀形在昔爭聞子命又荅潘尼詩曰於穆同心如瓊
如琳我東日徂來餞其琛彼美潘生實綜我心探子
玉懷疇爾惠音又贈馮文羆詩曰嗟我人斯戢翼江
潭有命集止翻飛自南出彼幽谷及爾同林雙情交
映遺物識心又贈潘尼詩曰水會於海雲翔於天道
之所混孰後孰先及子雖殊同升太玄舍被玄冕襲
此雲冠遺情市朝永志丘園靜猶幽谷動若揮蘭又

事類彙編 卷之三
贈從兄車騎詩曰孤獸思故藪離鳥悲舊林翩翩遊
宦子辛苦難爲心髣髴谷水陽婉奕崑山陰營魄懷
茲土精爽若飛沉又贈波丘令馮文羆詩曰夙駕出
東城送子臨江曲密席接同志羽觴飛酃醁登樓望
峻吸時逝一何速又贈紀士詩曰瓊瓌俟豐價窈窕
不自鬻有美蛾眉子惠音清且淑修姱協姝麗華顏
婉如玉又贈顧彥先詩曰清夜不能寐悲風入我軒
立影對孤軀哀聲應苦言

晉傅玄答程曉詩曰奕奕兩儀昭昭太陽四氣代升
三朝受祥濟濟羣后戢戢聖皇元服肇御配天垂光

伊周作弼王室惟康顒顒兆民蠢蠢戎羶率土充庭
萬國奉蕃皇澤雲行神化風宣六合咸熙遐邇同歡
赫赫明明天人合和下罔遺滯焦朽斯華矧我良朋
如玉之嘉穆穆雖雖興頌作歌又荅程曉詩曰羲和
運玉衡招搖賦朔旬嘉慶形三朝美德揚初春聖主
加元服萬國望威神伊周敷玄化並世霑天人洪涯
歌山岫許由嗟水濱

晉傳咸贈褚武良詩曰爰暨于褚惟晉之禎肇振鳳
翼羽儀上京聿作喉舌納言紫庭光贊帝道敷皇之
明方任之重實在江揚乃授旄鉞宣曜威靈悠悠遐